



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim

tiryimyim@aolima

tir yimyim TAPAK 8

Meghalaya BJP Minister-i nashishi
talila achitsü ayongzüker

Rashad Hussain religious
rights ambassador kumogo



VOL. XVIII NO. 287 (ADOK 287) DIMAPUR

AMUNGNÜ (SUNDAY)

LUROI (AUGUST) 01, 2021

₹ 5.00

COVID-19 Nagaland: 159 dak putet, 95 taneptsü angu & 5 asü

Kohima, July 31, 2021 (TYO): Honibarnü Nagaland nung nisung 159 dak COVID-19 putet aser nisung 5 asü.

"Tanü nisung 159 dak COVID aliba putet. Parnokji Kohima nung 61, Dimapur nung 47, Tuensang nung 26, Mokokchung nung 15, Peren nung 4, Mon nung 3, Phek nung 2 aser Wokha nung 1 lir. Parnok züngsema nisung ajak agi 27,872 kumogo" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Honibarnü COVID-19 puteta alir nisung 95 taneptsü angu. Parnokji Kohima nung 43, Mokokchung nung 26, Peren nung 8, Dimapur nung 7, Kiphire nung 6, Phek nung 4 aser Longleng nung 1 lir. Parnok züngsema taneptsü angur 25,193 kumogo" ta paisa ashi.

Nagaland nung COVID-19 nungi taneptsü angur 90.39% lir aser tang nisung 1,329 anepaludar, ta Dr Kikon-isa ashi.

"Tanü COVID-19 puteta alir nisung 5 asü. Dimapur nung nisung 3 aser Mon o Wokha

nung kaka asü aser parnok züngsema tasür ajak agi 566 kumogo, saka nisung 14 bo tanga tashidak ajanga asü" ta paisa metetdaksü.

"Tang tashi nung COVID-19 alitsü akok ta temolung melemi bilemba sample 263,703 tendangogo. RT-PCR ajanga 102,706, TrueNat ajanga 67,900 aser Rapid Antigen Test ajanga 93,097 tendang" ta Dr Kikon-isa ashi.

"Hokolbar tashi nung Nagaland nung nisung 616,961 nem COVID-19 vaccine indang dose 767,535 agütsüogo" ta State Immunization Officer, Dr Ritu Thurr-i ashi.

Vaccine agirtemji frontline workers 60,796, healthcare workers 15,966, arishi küm 45 ser temapur 185,115 aser arishi küm 18 nungi 44 tsüingda alir 355,084 lir, ta paisa metetdaksü.

"Vaccine agirtem rongnungi nisung 150,574-i dose anaprong agiogo. Parnokji frontline workers 39,572, healthcare workers 12,434, arishi küm 45 ser temapur 98,249 aser arishi küm 18 nungi 44 tsüingda alir 319 lir" ta Dr Thurr-isa ashi.

Aug 14 nungi Common Educational Services Examination, 2019 agitsü

Kohima, July 31, 2021 (TYO): August 14, 2021 nungi Common Educational Services Examination, 2019 atema 'written examination' agitsü ta Nagaland Public Service Commission (NPSC)-i metetdaksüogo.

August 9, 2021 nungi <http://www.npsc.nagaland.gov.in> nung candidate temi Examination Application Case Number agütsür Admission Certificate (containing details of routine and instructions etc.) download asütsü akok.

Admission Certificate malirtem tatidang magütsütettsü, ta NPSC-isa ashi.

August 2, 2021 anüingdang nungi <http://www.npsc.nagaland.gov.in> nung NPSC indang notice board nung 'rejected candidates' indang list angutsü.

August 9 nungi tenzüka anepdang 10:00 ako nungi nikongdang 3:00 ako tashi helpdesk number +918259977429 nung tongteprateptsü akok, ta parnokisa ashi.

Governor Ravi-i Tsüingremong salem abener

Dimapur, July 31, 2021 (TYO): Nagaland Governor R.N Ravi-i Aortem aser Nagaland nung alir ajak dangi Tsüingremong salem metetdaksüogo.

"Aortemi tesentaktep akangshitsü aser temoatsü keta alu aroba atema Tsüingrem nem tenüngsang agüja Tsüingremong amonger.

Alemlü nungi iba sobaliba benjung mongyonga aruba ya Aor senmang tajung ka lir. Aortem aser talisa lanurtemi iba benjungmong nung tesentaktep akangshitsüba tangatetbatem sangdongtsü ayongzüker" ta Governor Ravi-i ashi.

"Nisung ajaki COVID-19 inyakyim benshi

Nagaland aser Assam-i UAVs o satellite noksatem amshia arrtsü anüktsü

MOKOKCHUNG ASER JORHAT SP TEMI ARRTSÜ NUNGI POLICE ANIENTSÜ

Kohima, July 31, 2021 (TYO): Desso Valley Reserved Forest aser Tzürangkong valley nung arrtsü tensa tajungba kümdaktsütsü atema Honibarnü Nagaland aser Assam Chief Secretary temi tenangzüktep ka nung sign sütepogo.

Arrtsülen mangatettep alidak tensa meraksatsü atema state anaprongi unmanned aerial vehicle (UAV) aser satellite imagery amshia anüktsü nangzüktep.

July 31, 2021 nü Chumukedima Police House nung Nagaland Chief Secretary J Alam aser Assam Chief Secretary Jishnu Barua nati tenangzüktep nung sign asü. Iba sentong nung Nagaland Deputy Chief Minister & Home minister Y Patton aser Assam

Education Minister Ranuj Pegu na aden.

Nagaland kübok Mokokchung aser Assam kübok Jorhat nung Superintendent of Police (SP) temi iba tesem nungi police anientsü molungtepogo.

Nagaland kübok Ao Senden Village o Vikuto Village aser Assam kübok Jankhona Nala/ Nagajankha o Compartment No.12 temeket nung yimjung ayutsü atema Nagaland aser Assam police tem anientsü nüngdaker ta tanü state anaprongi molungtepogo.

Taruba ghonda 24 tsüingda arrtsülen mapa lemezüka aliba Assam aser Nagaland police tem pei pei tesepe aotsü atema telemtetba agi.

"Assam nungi Minister Pegu and Chief Secretary Barua nati

tenangzüktep nung sign asütsü atema Nagaland tashi aruba atema kanga pelar" ta Y Patton-i ashi.

July 24 aser 25 anogotem Union Home Minister Amit Shah den jembiba sülen iba tenangzüktep ya agir, ta paisa ashi.

Assam ketdangsurtemi Naga nung senzüsenbonger nem timtem magütsütsü mepishir, ta Y Patton-isa ashi.

Assam Education Minister, Pegu-ia Amit Shah, Patton aser Nagaland o Assam chief minister tem dang arrtsü ken o angatettepba atema tenüngsang agütsü.

"State ana tsüingda tesentaktep tajung aliba meraksatsü imlar" ta Pegu-isa ashi.

Nagaland nung tanü nungi Unlock-4 tenzüker

Kohima, July 31, 2021 (TYO): Nagaland sorkari August 1 nungi 18 tashi Unlock-4 alitsü osang metetdaksüogo.

Nagaland nung Unlock-3 mapang 'positivity rate' 10.83% nungi 10.57% ajemogo. July 17 nü Unlock-2 tembangdang 10.83% liasü.

"Honibarnü Chief Minister Neiphiu Rio menden ser High Powered Committee (HPC) on COVID-19 senden ka amendang August 1 nungi 18 tashi Unlock-4 alitsü telemtetba agi" ta HPC spokesperson aser Planning & Coordination, Land Revenue and Parliamentary Affairs Minister, Neiba Kronu-i ashi.

Iba mapang dokantem ghonda 12 (anepdang 6:00 ako nungi nikongdang 6:00) tashi lapoktsü HPC-i lemetetgo.

Unlock-4 mapang sorkar aser nija bus transport services nung

nisung 50% amentsü melar, ta Minister Kronu-i ashi.

July 28 nü Gauhati High Court (GHC), Kohima Bench-i Nagaland sorkari mapa inyaker ajak COVID-19 vaccine agitsü tetuyuba agütsüba sota ayuba atema Kronu-isa ashiba agi "iba ken o angadandang sorkari onüktem benoktsü."

"GHC, Kohima Bench-isa Home Department dang school, college aser technical institution ajak nung teaching aser non-teaching staff vaccine agitsü tetuyuba yanglushitsü ashiba agizükogo aser iba atema SOP balaka sangoktsütsü" ta paisa metetdaksü.

Nagaland nung aseben tashi Unlock asüandang kilung nung nisung 50 aser kima nung nisung 100 tashi dang adenshitsü tuyuba memelenshir, ta Kronu-isa shisem.

"Unlock 4 mapang curfew aonung 8:00 ako nungi anepdang 4:00 ako ta alitsü melenshir" ta HPC co-spokesperson aser Information Technology, Science and Technology, New & Renewable Energy Advisor, Mmhonlumo Kikon-ia ashi.

GHC Kohima Bench tetuyuba atema Kikon-isa ashiba agi, iba ken o taruba angadandang sorkari vaccine agütsüba indang osang benoktsü.

GHC Kohima Bench-i August 18 nü iba ken o angadangsü anogo shima lir. Okadaki sorkar mapa inyaker tem dak nungi tendangba sen magitsüla aser vaccine magiba atema itasen sota mayutsüla ta shiogo.

Unlock-4 indang SOPs aser tanga teinyaktsütem pei pei District Task Force (DTFs)-i metetdaksütsü, ta Advisor Kikon-isa ashi.



Phek district kübok Khomi-Pholami nung anentsüh aludak gari ka anenbanger aliba angur. Anogo ananü shi tzünglu kanga aruba agi Phek district kübok yimtsüng pungu nung anentsüh ajanga gari lenmangtem anenbanga lir. SP Phek-ia Phek-Khomi-Pfutsero road nung mesenzütsü atema osang metetdaksüogo. (Phek, July 31)

MAT-i takok angurtem nem tenüngsang agütsü

MAT SENPET ANGURTEM

				
KENEINO THORIE Trinity School, Kohima Mayangnokcha Award "for Academic Excellence" The Overall Topper & MAT-YRSD Award Subject Topper- S/Sciences. YRSD: Youth Resources & Sports Department, Govt. of Nagaland.	ATULA W. MONGRO Nagaland Christian Residential School, Mokokchung MAT-RC Award Subject Topper- Ao (MIL) Rockdale: Rockdale Club of Mokokchung	YIMYATELA LONGKUMER Holy Cross Hr. Sec. School, Dimapur MAT-TY Award Subject Topper- Science Tir Yimyim: Dimapur based News daily (Ao)	VIBELI K ACHUMI Fernwood School, Kohima MAT-EFoM Award Subject Topper- Mathematics EFoM: Education Forum of Mokokchung.	TIAMAONG AIER Don Bosco Hr. Sec. School, Dimapur MAT-CEC Award Subject Topper - English CEC: C-Edge College, Dimapur.

Dimapur, Chiteni/July 31 (TYO): Mayangnokcha Award Trust (MAT)-i sangdong ka ajanga, 2021 Mayangnokcha Awards for Academic Excellence agizüker ajak nem parnok takok tajung asoshi tenüngsang agütsüba den parnok kaketshisatsü bushiloka aoba nung takok asoshi sarasademja ataba lemsatepogo.

NBSE-i achaayanga agiba HSCL tatidang nung jenjang kar nung topper tem nem MAT-i küm 28buba Academic Excellence award agüja arudar.

MAT ya teyari agütsüba loktitentet ka, koba 1993 küm amenok aser iba lokti yagi Nagaland Board of School Education-i achaayanga agiba tatidang nung HSLC toppers tem nem tetushi agüja arudar. Tetushi ya state nung education jenjang ajungkettsü aser academic sector nung Naga nunger lanurtem temaba jenjangi ajungkettsü nukjidong nung agüja arudar.

MAT-i, High School jenjang nung takok tajung anguba Naga nunger kaketshirtem jangjaa

tetushi agütsür aser ajungmsor. Iba ajanga kaketshirtem tsüingda kaketshisatsü bushiba luyim nung tajungyimi tokteptsü atema tanüla ka adokdaksütsü meranger aser iba ajanga parnok dak aketba tajungtiba temai adokdaksür aser education jenjang tajungba akümer.

Tetushi agütsüba ajanga tetushi agizükba kaketshirtem ajungmesoba dang masü saka kaketshir ajak ajungmesor, ta Mayangnokcha Award Trust (MAT) Secretary, Dr. Furkumzuk-i ashi.

Medziphema nung "World Day Against Human Trafficking" mungogo

Dimapur, Chiteni/July 31 (TYO): Alima ajunga nung "World Day Against Human Trafficking" anogo ayongzüka amungba mapang 7 Assam Rifles Ghaspanti Battalion-i Medziphema jila nung awareness drive sentong ka ayongzüka agiogo.

Sentong nung State Police Department aser NGOs & CSO tem nungi Human Trafficking luyim nung mongintemi shisatsü balala agütsüba den sensaksem sentong ayongzüka agi.

ADCP (Crime) Dimapur Relo Aye-i, Human Trafficking dak sendaka aliba anti-social nexus indang metedaksüba den iba nungi jenboa alitsü atema lokti nung ajaki agitsü nungdakba

jenjangtem indang metedaksü. Paisa, lendong mapang teyari kara kara meshitetsü atema ajaki phone no. ka mesera anabosa temulung nung yua alitsüla, ta ashi. Kasa mapang nung Holistic Counselor Kilentola Jamir-i, "Victims' Voices Lead the Way" onük nung ajemdaker jemi. Sentong nung tanga counselors temi tetsürtem atema state helpline numbers (181) aser tanur arishi küm 18 tekübok alirtem atema helpline number (1089) indang metedaksü aser ashiba agi, item number tem ajanga Nagaland kübok tesem mashi ka nung 24x7 teyari agütsütsü.

Iba sentong ya Medziphema Town Mechü Krotho (MTMK) den longjemmer ayongzüker aser

Medziphema jila nungi lenirtem, Gaon Bura tem, tetsür, lanur aser kaketshir lokti tentet balala lenir 70 shi-i shilem agia liasü.

"Be Wise - Be Safe" omen nung ajemdaker Assam Rifles-i nüburtem nem tangazükba agütsütsü atema sentong tajung ayongzüka katsüba atema sentong nung shilem agirtemi parnok dang kanga pelaba lemsatepa liasü.

Iba sentong ya Atsi Jamir lenisüba nung agi aser 2 I/C, 7 AR Medziphema-i lokti pelaa agizükba o jemi. Maneni Tei Meyase, Treasurer, MTMK-i sarasadema sentong tenzüker aser Neitsolowe ken ka aten. MTMK tir Akhoto Kuotsu-i tepela ankiup o jembiba sülen sentong tembang.

Arkakong area nungi Class 10 toppers nem tetushi agütsü



Dimapur, Chiteni/July 31 (TYO): July 30, 2021 nü 22nd. Arkakong area nungi Class 10 toppers (2021) tem nem tenüngsang agütsüba sentong ka lenir Mr. & Mrs. Imnatiba MLA/ Advisor kibongi ayonga Hotel Saramatani nung agia liasü. Iba sentong nung area sanger yim balala nungi arua aden.

Moatemjen senior PS to Advisor-i sentong ania aser Missionary Lima Imsong (samaro) sarasadema sentong tezük. Tayongzüka O; Yaongyimsen Union Chumukidema, Changtongya Union Dimapur aser Principal CSHSS CTN ajanga jembia sentong meraküta agi. Changtongya Town Circle Schools aser nübur ajak nem tenüngsang agütsüba Arogo

School kisüngi merangba agi dangbo iba takok konang ngutetba masü saka arok shisatsü agi tanü asen CTN nem korang semtsür ta Principal CSHSS-i ashi. Ano Lai tayongzüka ka agütsübaji, Education-ji Town/ Yimtsüng ta kecha tebandang mali ajak nung kesadang lir. Area sangeri asen Yimtsüng/area nung politics nung dang masü educational institutions nung temulung agütsüba, rongsenketzüng nunga asen jila nüburtemjia ajungkettsü ana nung lir ta shisema Arogo, Managing Board aser Staff ajak nem tetushi agütsü.

Kasa mapang nung MLA kinungtsü Asenla Walling-i, toppers par pezü (Yimyatela Longkumer, Yashijungla, Longtila Jamir aser Yangertemjen) den

tepela Salem agütsüba temeim sayu.

MLA/Advisor-i, agidang nungi CTN jila nung kaketshisatsü bushiba luyim nung toktepa lia aruba tanü jungkai atoka top 20th. nung atokogo ta ashiba den tesayurtem, faculty members aser Arogo nem tenüngsang agüja liasü. Toppers par pezüi Arkakong MLA nem konang korang semtsür ta temulungang ajak agi pelar ta paisa shisem. Kaketshisatsü bushiba luyim nung iba ama takok tulu ngutetbaji atamata masü, anungji nenok tarutsü nung ano mangdang tuluba nung rangloker liyonga aodang tia ajak nung yaritsü ta tajungshi o shia pai tesenteper ayongzüker.

Sentong tatem küma Rev. Lanuakum Jamiri sarasadem

OFFICE OF THE
AO SENDEN
H.Q: MOKOKCHUNG : NAGALAND
Ph: 0369-2228896/ e-mail: aosenden@gmail.com

TSÜNGREMMUNG SALEM

Aor watsü wabong, tulu tila ajak dangi tepela Tsüngremmung benjung salem Ao Senden mendenti nungi lemsateper. Iba Tsüngremmung mongpu mapang, asen Ao kin sobaliba senmang tajung koba asen tsürabur mapang nungi beshia arudagi item sobaliba meraket wazüka yua Tsüngremmung benjung shisangdaksüba den Tsüngrem nem tenüngsang agüja temoatsü jazükba mongpu ka sädaksüdi ta ayongzüker.

Sd/-
Chubawati Longchar
President

Sd/-
Imtipokyim
Secretary

GPRN-i asühku lemsatep

Dimapur, Chiteni/July 31 (TYO): Government of the People's Republic of Nagalim (GPRN)-i, sangdong ka ajanga Shongshen Battalion, Naga Army nung 2nd Lieutenant Moses Chithung July 30 nü asüba osang angazüka mang ayimba lemsatepogo.

Pa Wung Tangkhul Region (WTR) kübok Kangpat yimtsüng nungi liasü. Pa Naga nunger tenzüksü atema 2001 küm February 20 nü züngoksem, ta kasa sangdong ajanga metedaksü.

Pai masü tashi Naga nunger masetshi tenzükgogo aser pa melener angutsü tasak asütsü. Pai Naga nunger bendanga agüja

tenzükgoba atema Naga nunger puti otsü nung teti atema mangaoka ayutsü aser menungraabilemtetsü.

Pai Naga lima bendanga agüja tenzükgoba temaitsü pa nem Naga Army, Adjutant General-i July 30 nü Lieutenant rank agütsüogo, ta sangdong ajangsa metedaksü.

NSCN/GPRN-i Lieutenant Moses Chithung'er kinungertem den asükhu lemsateper aser tulusang Tsüngremi mangyim jashi mapang par kinungertem nem anisüngzüker agüjang ta sarasademsüba den asür tanüla teti tatem makadak anisüngzükdakjang ta sarasademsüba, MIP, NSCN/ GPRN-i metedaksü.

Security Forces-i ozüng alema yi belener 4 apu



Dimapur, Chiteni/July 31 (TYO): Police den longjemmer Security Forces-i, July 29 nü Zunheboto district kübok Suruhoto nung yi belena ayonger nisung pezü puogo.

Osang tejangia angazükba sülen Security Forces aser state police na senteper Suruhoto

nung tesem kar meita aoba mapang nisung pezü apu aser parnok ket nungi sen lakh 2.7 alang yi puogo.

Aibelena alirtem aser parnok ket nungi apuba yitem ajak Suruhoto Police Station nem ken o maneni bushitsüngdangtsü atema bendanga agütsüogo.

Noklak nung DC tasenba agizük

Dimapur, Chiteni/July 31 (TYO): Noklak Deputy Commissioner tasenba, Hiazu Meru, NCS agizükba sentong ka July 31 nü DC Conference Hall, Noklak nung agiogo.

Sentong nung o jembiba mapang Hiazu Meru-i, District Administration den department balala, lokti tentet balala aser stakeholder tem ajak longjemra district jenjang tasenba ka tongtettsü ta ashi.

DC tasenbai, Nagaland nung Noklak ya district tem rongnung tasentiba lir asü nung tetsükdaksü aika ajangshitsü ta shia tetsükdaksütem ajangtettsü atema ajak longjemmer inyaksü ayongzüker. Meru-isa, department, NGO, Arogo aser district nung aliba

nüburtem dang teka amteper inyaksü ayongzüka liasü. Pai, Noklak nung inyakba mapang takok tashi tajungtiba inyaksü tenangzükgoba agütsü.

DC pelaa agizükba sentong ya SDO (Civil), Noklak, C. Phuniang lenisüba nung agi aser Khiamiungan Tribal Council, mendenbuba M. Thangou-i lokti pelaa agizükba o jembia liasü. Kasa mapang nung Superintendent of Police, Noklak, Dr. Pritpal Kaur, IPS-i o tatsüka jemi.

Iba sentong nung district administrations nungi ketdangsurtem, department tekolaktem, kin lenirtem, Arogo lenirtem, DBs & GB, Deputy Commissioner office staff tem aser Noklak nung alirtem dena liasü.

Meghalaya BJP Minister-i nashishi talila achitsü ayongzük



Sanbor Shullai (File photo)

Shillong, July 31, 2021 (Agencies): Meghalaya BJP Minister Sanbor Shullai-i state nung alirtem dang nashishi talila achitsü ayongzükogo.

"Anshi, napongshi aser ango dang nungi nashishi teimba chiang. Democracy linük ka nung nisung kato kechi chinür achitsü akok" ta Shullai-i ashi.

"Nübertem dang nashishi teimba achitsü ayongzükba ajanga BJP-i nashi tepsetba noktangsü ta asüba tangatetba agentsü" ta pai osangbener dang ashi.

Assam nung Cattle Protection Bill ajanga Meghalaya nung tetsükdaksü majurutsü atema Assam Chief Minister Himanta Biswa Sarma den jembitsü, ta Shullai-i nangzük.

BJP MLA Shullai ya taoba hopta Cabinet Minister inyaksü shimoka liasü aser pa Animal Husbandry & Veterinary

Minister lir.

MIZORAM NUNGER NEM TENÜNGSANG AGÜTSÜR:

"Mizoram nungeri kanga dang tasü itta pei ali kümzüka ayutsü atema noktakba tenüngsang agütsür aser Meghalaya nungeria Assam den arrtsü ken o atema yamai noktaksüla" ta Shullai-i ayongzük.

"Mizoram nungeri parnok maitsü meimer. Nübertem aser police külemi parnok kümzüka ayutsü atema inyaker" ta paisa ashi.

Mizoram Rajya Sabha MP K Vanlalvena-i "parnok ajak tepsetang" ta olen ka jembiba ama Meghalaya nungeria kasa tangatetba alitsüla ta Minister Shullai-isa ayongzük.

"Assam-i arrtsülen alirtem nem timtem agütsüpet agütsüra public aser police tangatetba melenshitsüla. Külemi mener

olempetba dang masü saka tesem nungjisa mapa inyaksüla" ta paisa ashi.

"Asenoki asen kümzüka ayutsüla. Tsükchir ka nür kidangi arur nür kinugertem amak nungbo, naia lendong nungi kümzüksü atema raratsü" ta Shullai-isa metetdaksü.

"Ni ozüing alema inyaksü ajungmesor masü saka nübertem kümzüka ayutsü aser Meghalaya police-i tim mapa inyaksü ayongzükberba dang lir. Meghalaya police yakbang ser Assam police den jembitsüla. Aiben police ji civilian tem tesülen ang asüba ajuruogo. Bangdak ketdangsürtemi police dang nübertem kümzüksü atema yakbang ser noktaktü tetuyuba agütsütsüla" ta Minister Shullai-isa metetdaksü.

Meghalaya aser Assam arrtsü anasa aliba Iongkhuli yim nung tawa mangatetep adokba atema pai iba olen jembi.

Agartala okadaki IPAC telok nem bail temelaba agütsüogo

Guwahati, July 31, 2021 (Agencies): Agartala nung local court kati züngsem 22 agi akümba Indian Political Action Committee (IPAC) telok nem anticipatory bail temelaba agütsüogo. Parnok ya Tripura police-i pua liasü.

West Tripura District and Sessions Court-i parnok nem anticipatory bail temelaba agütsü.

Anogo asemnü tashi ozüingi memelai parnok pua ayu aser iba

sülen jiang parnok anema ken o tem benok ta IPAC team counsel Pijush Kanti Biswas-i ashi.

Külen, Trinamool Congress lennir aser Rajya Sabha leader Derek O'Brien-i Brihostibarnü Agartala atong.

"I-PAC züngsemtemi Trinamool Congress-i hire asüba aser onok indang mapa inyaksü atema yangi aru" ta O'Brien-i ashi.

BJP central leadership tetuyuba nung ajemdaker parnok

Agartala nung apu, ta paisa tai tongloktsü.

IPAC team ya Agartala nung mongzük yimtenren tensa aser TMC indang tashi asadangerba liasü.

Ajisüaka, taoba Deobar aonung Covid-19 inyakyim nung ajemdaker Tripura police-i parnok hotel ka nung 'house arrest' asü. Ajisüaka, Mongulbar aonung parnok dak Covid-19 tendangba negative osang angu.



Assam kübok Nalbari district nung alir Jituddin Ahmed-i aou aser süng amshia bicycle ka yangluba noksa nung angur. Amnir Zamiruddin aser Mazida Bibi na jabaso Jituddin ya West Chamta nung alir aser pai yangluba bicycle nung pedals, chains & brakes keta lir. Iba dak alia paisa aou aser süng agi guitar, airplane, swing, tiny houses aser tanga oset aika yangluogo. (Nalbari, July 31)

**OFFICE OF THE
AO SENSO TELONGJEM DIMAPUR
SANGDONGER**

2021 Covid-19 wara mapang nüburtem yariba mapa ajak nung Dimapur aser temeket nung *Ao Senso Telongjem Dimapur* aser *Dimapur Area Ao Baptist Churches & Civil societies* külemi longjemer inyak ta maneni nübur ajak dang pelaba lemsateper.
Tsüngremi asen Ao kin maneni moajang.

Sd/- P. Sashi Longchar Sect. ASTD.	Sd/- Imti jamir Sect Dcs.
---	--

Mizoram Governor-i President Kovind den ajurutep

Aizawl, July 31, 2021 aser civilian ka asüba sülen (Agencies): Honibarnü Mizoram Governor Dr Hari Babu Kambhampati-i President Kovind den ajuruteper.

"Mizoram Governor Dr. Hari Babu Kambhampati-i tanü Rashtrapati Bhavan nung Nath Kovind den ajurutepogo.

Taoba Hombarnü Assam aser Mizoram arrtsülen lendong atalokdang Assam Police pungu nung osang metetdaksü.



Baksa district kübok Tamulpur tesem nung arem shiti telok ka angur. Yashi Tamulpur kübok Anthaibari yim nung arem shiti kati arishi küm 55 tain Koze Wary tepset. Koze ya ayong nung tzü atai aodang shidiji ajurua pa kanga mejungi yirutsü aser iba sülen pa Gauhati Medical College Hospital (GMCH)-i anir ao saka idakji asü.

Mizoram police-i Assam CM aser ketdangsür 6 anema FIR benok Assam Police-i Mizoram MP aser ketdangsürtem jaoker

Guwahati/Aizawl, July 31, 2021 (Agencies): Mizoram Police-i Assam chief minister Himanta Biswa Sarma aser ketdangsür aika anema FIR benokogo.

July 26 nü arrtsülen police 6 aser civilian ka taküm samatsüsa tasa tamajung atonga inyakba atema FIR benok.

Mizoram Police-i benokba FIR nung Sarma den Assam IGP Anurag Aggarwal, DIGP Devojiyoti Mukherjee, Cachar DC Keerthi Jalli, Cachar, SP (former) Vaibhav Chandrakant Nimbalkar, forest officer Sunnydeo Choudhury, Dholai police station OC Sahab Uddin aser mejangjatetba Assam Police 200 tetshia lir.

Vairengte police station nung Inspector H Lalchawimawia-i FIR ji benok.

Indian Penal Code (IPC), Arms Act aser Mizoram Containment and Prevention of Covid-19 Act 2020 kübok arrla balala nung pa dak tai tongloktsüogo, ta Lalchawimawia-i ashi.

IGP-i anir Assam Police 200 tashi prangpong-injang teperi bener Mizoram police 20 tashi amokmeren aser tashiyim agi police camp agitsü merang, ta Mizoram police-i ashi.

"Mizoram Police-i parnok nübo memenep aser police camp kümzüka meyutet. Iba osang angashiba sülen SP Kolasib aser police telok ka tesem tonga ao aser Assam Police den jembitepsü merang, saka parnoki (Assam) tashi manga aser iba tesemji Assam meyong lir ta tekong meranga

noktak. Assam Chief Minister-i tuyuba ama parnoki police camp ka amenoktsü ta ashi" ta FIR nung shia lir.

Assam Police-i tashiyim agi Mizoram BOP atsünga agiba sülen camp amenoktsü atema gari 20 nung süki aser tanga osettem bener aru, ta FIR nung shia lir.

Yashi Mizoram chief minister Zoramthanga-ia Assam Police-i tamasa injang khaloktsü ta metetdaksüogo.

"Assam Police-i mezüing injang khaloktsü. Onoki mekhadok. Himanta aser Shah na den jembiogo. Onoki timi angatettepnür. Himanta-i timi angatettepnür ta shiogo. Nüngdak süra onoki CM ajak den olemtep tanabula alitsü" ta Zoramthangai ashi.

Hokolbarnü Assam police-ia Rajya Sabha MP K Vanlalvena dena Mizoram nung tongtipang ketdangsürtem dang asüngdangya asütsü jaokogo.

Assam police-i New Delhi nung MP kidangi oa summons agütsü.

Assam Police-i jaokertem rongnung Kolasib Deputy Commissioner Dr. H. Lalthlangliana, SP Vanlalfaka Ralte aser Additional SP David JB nunger dena lir.

Parnokisa Vairengte SDO(Civil)C. Lalrempuia, Addl. SP of I't IRBn Bruce Kibby, aser Vairengte SDPO Thartea Hrangchal nungertem jaokogo.

August 2, 2021 nü parnoki Dholai Police station nung investigating officer tsüngdangi arutsüla ta Assam Police-i metetdaksüogo.



TIR YIMYIM YIMOBILEM (EDITORIAL)

DIMAPUR AMUNGNÜ, LUROI (AUGUST) 01, 2021

Tang tenzüksüla

Tsüngrem tenzüksüba ya alu mapa temer mesüra kisüjensü mapa temer mesüra tanur ajak tainkümer mesüra tang teinyakdak mapa nungi anener tenzüksü ta masü saka kodang jadir mesüra nungloksüdir idangjisa tenzüksüba mapa ka lir. Tsüngrem tenzüksü ajaba aser bilemtetbaji Tsüngremi agütsüba maongka ta angateta idangjisa anidaksüla mesüra inyaksüla. Aji oda, asenok Khristan taküm nung inyaksüba mapaji Yisu Khristai mulungba nung anidaksü asü masü ta bilemdangtsüba masü saka Pai inyakdaksünüba mapaji idangjisa inyaksüla. Yisu alima nung alidang nübertem rongnung pa mapa inyaka jajaba mapang, kenü anogo Pa sülen anidaker nisung kati Pa dang pa tebu aremtsü tama melaang ta mepishiba tatalokba otsü ka Mathi 8:21 nung shia angur. Iba otsü nung angatetba agi, Yisui iba nisung dang Pa sülen pa akaba ajak toktsür anidaksü asoshi asüngdang sudi. Aji oda, iba nisung yagia ma tabo mashi saka pa teinyaksü ali mapa ajak temer külenang Yisu sülen anidaknü. Yihuda nungertemi pei tsüraburtem kanga meimer, anungji kodang parnok tantsür tambur kümdir, pei chirnurtemi parnok masü tashi kanga junga anepalur aser sür külenang parnok pei leper nung kanga junga remadoktsür. Yisu dang pei tsürabur tama rema yutsüdi ta asüngdangbaji nisung tsütsübo shitak dang liasü. Laishiri ashiba agi, iba nisung pa tebu tama rema yutsüdi ta asüba tetezüji tebuji ano masü taküm lir asütsüa akok, saka kanga tambur kümer tasür dang alinungji pa tebu akümlü mapaji tama tobur junga tembangdakjang ta ashi sudi. Ajisüaka, Yisu sülen anidaksüba asen alima mapa temer külenang ta masü saka ajak toktsür idangjisa anidaksüla. Ibayongjiang, Yisui iba nisung dang ashi, " Kü sülen anidakang aser tasürtemi pei tasür aremtsü tokjang." Tetezü, paji Yisu sülen anidakyongbo tebuji aremtsü aoshibo tasütsü purtem rongnung nübo peria angutsü. Aji oda, Peteri Yisu dang, "Onoki onok akaba ajak toktsür nü sülen anidak," ta Mathi 19 : 27 nung ashiba angutsü. Iba jagi Yisu sülen anidaker nütsüngtem tangatetba aser temulungtetba sayur. Asenok aikati yimten khen tenzükür külenang Tsüngrem tenzüksü ta bilemer, mesüra kinungertem khen yaria lir külenang Tsüngrem mapa inyaksü ta bilemer. Ajisüaka, asenoki asen mapangji memetet. Item ajakji Tsüngrem ket nung lir. Aji oda, kodang Tsüngremi asenok nem langka inyakdaksünüa jadir, memenütsüla, kechiyong pai asen nungdak ajak meteta lir. Tsüngremi asenok tenyaba tetezüji oagi kibong ka nung mesüra tesem ka nung lendong lir, kar tesamar lir, kar tekümtet, kar tesünep aser kar taneptsü aginüa atadar asütsüa akok. Iba jagi meteta asenoki tashi angatsüla. Tsüngremi ashiba angaba nung temoatsü aser takok ajak keta lir. Atangji, asen taküm nung Tsüngremi ajaba metetsüba kanga tongtibang lir. Tsüngremi ajabaji, ashiko, nisung kar ajanga Tsüngrem tenzüksü ajungshitsüa akok, mesüra kar yaritsü mesüra kar den jungteptsü asoshi temulung nung jembitsüa akok. Itemji meteta asenoki idangjisa inyaksüla. Tsüngremi ajadang melangzüba aser nungloksüba mapa meinyaki süitemdaksüba mapang tajungji kodanga tanaben meyipa marutsü. Ibayongji, Efesa 5:16 nung mapang tajung ajak alangzükang ta shia angutsü. Tetezü, tangar asoshi tajung inyaksü anguba mapang ajakji Tsüngremi agütsüba mapang tajungji asütsü. Tsüngrem mapa inyaksü asoshibo asüng aru matatsüla. Aji oda, nisung kati tebu remer külenang Yisu sülen anidaksü bilemba ama asenok aikati pei chirnur tama züngtetter külenang mesüra pei tsüraburtem nungdak tama ataloktsür külenang Tsüngremi mapa inyaksü bilema alitsüa akok. Ajisüaka, bilemdang, pei chirnur dang tama mesüra pei tsüraburtem dang tama asenok anjungji oadokra koda tesasatsüka asütsü! Kodang Tsüngrem tenzüksü jadir, idangjisa tenzüksüla.

OLEMSABANG

Kipok tesayuba bulua alidak tekümsük lir aser nukjidongtem ataloker

~ L. Kika Pongener

Shisa taka leniba malidak nübur laor, saka kipok tesayuba bulua alidak tekümsük lir (A.Shin-11:14). Kipok sayuba makara nukjidongtem mataloker, saka shisa tajung agütsür aliba agi itumji ataloker (A.Shin-15:22). Kibong nungi tenzükür yimten, arogo aser loktiliba ajunga tashi-ita, longjema, renloka tejakleni aotsü asoshi kipok sayu-bentsü aser shisa tajung agütsür bulua alitsüla. Kanga tesasatsü-ka, tang asenok aliba putu nung ya, loktiliba ajunga nung meputep, tsükchitep, tarishitep, nukmeremtep, telemsatep agi sunga lir. Loktiliba teimba ka nung lenisuba (Leadership) tokolak menden raktepba agi sunga lir. Itum ajak ya kechi küli ajanga yamai adoker (?)...ta bushidanga ora, kipok sayu-bentsü bulua makaba ajanga teimba adoker. Apijemtsü shin o nung ashiba ama, kipok sayuba makara nukjidongtem mataloktsü, saka shisa tajung agütsür bulua lira nukjidongtem ataloktsü. Koba linuk nung kipok sayu-bentsü aser shisa tajung agütsür bulua lidir, idakji yimjung, tesunep aser temeim agi sunga alitsü. Kipok sayu-bentsü bulua aliba linuk/yimtsüng/kibong nungjagi alima lenir, watsü-wabong, walunir, kenshir-oshir, alimai metetsüsa/tushitsüsa lenir tajung jenti sotetsü/adoktsü. Sungdong tajung nung sungjang tajung atangba agi, ozü sangnu, shiruru, mimchirtem anisungzüka, tzüratema, tepok sunga chiyimba ama, lenir tajung adokba jagi alima nem tajangzük agütsütsü, aser konang-nungsang bentsür arutsü. Koba linuk/yimtsüng nung kipok sayu-bentsü agi anung-akonga lidir, idakji aliba yimten, arogo, lokti-tentet kata yimjung nung sunepa malitsü, teti tsükchitepa arishitepa dang alitsü. Iba linuk/yimtsüngji renloka tejakleni aotsü melena rajang akümsü aser kodanga tangar linuk/yimtsüng maparen kecha nunga memenuptsü. Kechiyong nukmeremtepba, arishitepba, tsükchitepba, majinutepba, ibalaji kipok ajunga nung mapang aben bulua jembibaji, kibong nung tanür shia mulungjang nung, tanür asü dang nungi züngzünga jangoker aintsü, aser iba shisatsü tamajung jagi tanür tokolak shisatsüji menendaksütsü (Brain-washed). Kibong nung tsürabur shirnoki teti atepzüng nung tangar majung sukshia, tangar tenung asenba, nungsen-bangsen tang jembidir, ibala kibong nungjagi chirnur/semchi-semnur, watsü-wabong, tashi-tawar, kenshi-oshir, alima meimba lenir tajung, alimai züngshitsüsa/tushitsüsa kodanga mesotetsü/madoktsü.

Ajisüaka, koba linuk/yimtsüng/telok/kibong nung kipok sayu-bentsü bulua lidir, itum nungjagi alima lenir, alima yanglur, nungtuko nisung alimai metetsüsa aika adoktsü. Itum linuk/yimtsüng/kibong nungjagi tamaren chuba menden atema toktepba (Minister & MLA), sorkar mapa menden tulu atema toktepba (UPSC/NPSC Exam), yamala nung takok angur aika adoktsü, ano kaketshirtem HSLC & HSSLC tatidang nung 'Toppers' aika adoktsü, ano saisapong, lenla balala toktepba nung alimai metetsüsa mongin/ningtuko asayar aika adoktsü. Ajisüaka, koba linuk/yimtsüng nung kipok sayu-bentsü aser shisa tajung agütsür agi anungakonga lidir, iba linuk/yimtsüng nungjagi alima raksar, tansutsü/tetsütsü nisung, kiralongrar, nisung tepseteter, rakzükraakter, ashi-auer, tetsür taküm raksatsür, linuk/yimtsüng nem tenung menuk bentsür arur, mapa tamajung inyaker aika adoktsü. Aji oda, shirnoki indang-indanga, ochi mulungjang, temulungsentsü temeruk agi, nungsen metsübui, yimten, arogo, loktiliba ajungtsü asoshi kipok nung sayu-bentsü ashir, shisa tajung agütsür, parnokji Tsüngremi balaka moatsütsü/ajungkettsü. Ano shirnoki Tsüngrem pelatsüsa, Tsüngremi mulung achitsüsa indang-indanga, ochishia yimten, arogo aser lokti tenzükür, parnok chirnur/semchi-semnurji Tsüngremi balaka moatsütsü/ajungkettsü. Ajisüaka, shirnok dak teindang/ochi shisatsü mali, linuk/yimtsüng/loktiliba raksatsüsa shisatsü tamajung agütsür, sentong tapu-tapu sangra-sangjia atonger, külak-küponga tashiyim mapa inyaker, parnok chirnur/semchi-semnurji alimai metetsüsa/tushitsüsa, mesura yimten/arogo/loktiliba nung nüburi aka-ana ta sukshitsüsa/züngshitsüsa mesotetsü/madoktsü. Aji oda, nisungibo memetettsü akok, tenungsanga magütsütsü akok, züngoka malitsü akok, saka shirnoki pei lima meima mapa tajung inyaker, nübur tsüngda nung yimjung apula-a mapa inyaker, linuk/yimtsüng raksaa/lemsaa aliba nungsen-nungmen metsübutongti shilem agia yanglur parnok dak jakzükba chirnur/semchi-semnurji Tsüngremi moatsütsü/ajungkettsü.

Tanü asen Naga nung nuchiso bushiba mapa nunga tanü tashi nukjidong metongteti lir. Ashiko, iba ya-a kipok sayu-bentsü bulua makaba aser shisa tajung agütsür agi anungakonga ajanga asütsü akok. Tesasatsü-ka, tanü asen Naga nung tema/telung ajunga nung telongjem mali telemsatep/tsükchitepba agi sunga lir. Talisa linuk tenzükertem telok balala lemsar obang mapu/nukjidong balala/taginuba balala alitsü akok, ibaji ka kuma angatetepa longjemdaksütsü asoshi kipok sayu-bentsü aser shisa tajung agütsütsü kanga nungdaka lir. Anungji iba mapa nungji talisa kin shia nung hoho lenirtem, yimten yimsusur, arogo/mungdang lenirtemi nungsen arema, mapang endok mesasai, pei pei kin linuk tenzükertem nem shisa tajung agütsütsü kanga nungdaka lir. Surabangla, kipok sayu-bentsü, shisa tajung agütsürji shiba/shirnok shilem asütsü...??? Arogo & Mungdang nung tenzükertem, Reverends, Theologians, Scholars, Politicians, Bureaucrats, Senior Citizens, parnoki tongti shilem agia inyaksüla. Tesasatsü-ka, tanü asen lima nung Tsüngrem tenzükür, putir, laishir aika rongsen agi tenuk pokdaksür/supokrem nung alanger, mesura tashi-tawar/tata-tainer/rongsen akar/tongtipang nisung dak tsükdaker...Ochi tang ochi-a ta...Tiyazü tang tiazü-a ta meshiteter...Meshitak-a ta metetsümongaka, yamaibo meinyaksüla ta songtemtsü melena züzüa toktsüba ajanga, mangatetertemi tashiyim mapa inyaksü marentaki temulung ulua inyaker. Ano kanga tesasatsü kaji, nüburi kipok sayu-bentsü ashitsü imla-a aliba, shisa tajung agütsütsü imla-a aliba lenirtemi meshitaka ta metet-aka, nungsen tsübuba agi ola madoki repranga toktsüba ajanga tanü asen yimten, arogo, loktiliba ajunga shiranger. Anungji Tsüngrem tenzükertem, putir-tem, laishirtem nenoki tasü-ita, nungsen metsübui, indang-indanga, tanak dang tanak ta...temesung tang temesung ta...ainkar o jembitsüla. "Kong ainkar sayutsüngi mali, nübur tesoitba mali"(A.Shin-29:18). Tanü asen lima loktiliba teraksa/telemsa yanglushitsü atema kipok sayu-bentsü aser shisa tajung agütsür kanga nungdaka lir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



2013 kum Iran nung Muslim nunger aika Baptiba mapang tangokba noksa nung angur. April 17, 2013 nü Iran nunger Muslim 228, Pakistan nunger Muslim ka aser Afghan nunger Muslim 17-i Yisu Khrista agizuka Baptia liasü.

Iran nung reshikangshi marem Khristantem aika ajener

July 30, 2021: Iran nung reshikangshi ajanga Khristantem aikati pei lima toktsür ajener; Khristantem aika Turkey-i jena ogo aser aika Europe nung aliba linüktemi jena ogo, ta SAT-7 osang ajanga metetdaksü.

SAT-7 USA nungi Joe Willey-i, "Linük toktsür jena aoertem aikati parnok jenokba linük nung jembiba oshiji mejembiter, ibayongji parnok aikati mapa mangur. Parnok senotsü agi kanga timtemtsü, mesüra linük nungia mindoktsüa akok, kechiyong region tesem ajaklen refugees tebilemetsü onük tubaba akümer," ta metetdaksü.

Tawa SAT-7 PARS-i show Signal nung Iran nunger Khristantem indang jembia liasü. Willey-i, "Iba show ya minute 90 live sentong ka lir aser iba sentong ya SAT-7 PARS nung yoker. Iba show ajanga Iran nung Khristantem aser alima tesem ajungalen Farsi oshi jembir Khristantem sendakteptsür. Iba show episode

shia nung video aser presentations ajanga Iran nung tongtibang onüktem lemsateper," ta metetdaksü.

Iran nungi jena aoer Khristan karibo SAT-7 dak kanga metaloker.

Iran nung reshikangshi ajanga pei ki aser kibong toktsür ajentsü asü linük nung reshikangshi ang arema alitsüar iba telemteba agitsüji kanga temelabo masü, ta paisa shisem.

Iran nung Khristantem reshikangshiyonga iba linük nung Khristan yimsü kanga indar.

Tamalen US State Department report ka ajanga ashiba agi, alima nung kiralongra sponsor asüba linük mezüngbuba jenjang nung Iran lir aser Islamic kiralongrar telok balala nung tasenpur shimokba aser fund timtiba agütsüba linükjia Iran lir; yamaji linük nung kiralongra aser amokmeren jenti liaka Muslim nunger aikati Khristan yimsü dangi meyipar.

Open Doors USA-i ashiba agi, Iran nung Khristan yimsü

dangi meyiptsü mesüra sayutsüingitsüji ozüing alema lir, ibayongji Khristan pastor tem aika apur aser parnoki linük security anema inyak, ta tai tonglokja kum aika tepuokdak ayur.

Ajisüaka tang Iran Arogo nung züingsem million 1 jungnüa kumogo. Netherlands nung amenoka aliba research agiba telok GAMAAN-i agiba survey ka ajanga Iran nunger nütsüing shilem 1.5 bo Khristantem lir ta bushitet. Iran nunger Khristan 750,000 lir aser Iran nung alir Armenian aser Assyrian nunger 117,500 Khristantem lir, aser ajakji senteperbo linük nung Khristan tajemba agia 867,500 lir, ta bushiteta liasü.

Ajisüaka Christianity Today-ibo, Iran nung nisung meyipdar aika Khristan yimsü dangi meyipdar anungji linük nung Khristan million ka jungnüa alitsüa akok, ta metetdaksü.

Islamic linük- Iran nung Arogo nütsüing kanga ainba agi sorkar ketdangsertemi Khristantem anema ano taliba inyaker.

August 7 nü India nung Arogotemi wara atema sarasademtsü

Bengaluru, July 30, 2021 (Agencies): August 7, 2021 nü India nung Latin Catholic Arogoi linük tesem ajaklen aonung 8:30 ako nungi 9:30 ako tashi sarasademtsü ayongzükogo.

Tang India nung coronavirus wara agi nisung jenti timtemba tensa ka nung Arogoi sarasadem ayongzüküer; Khristantemisa kibong ka ama alima nung wara anentsü atema sarasademtsü.

St. Thomas (Yisu nütsüing Toma), St. Francis Xavier aser Mother Teresa nunger leper aser Marian Basilicas of Bandra (Mumbai), Sardhana (Meerut), Hyderabad, Shivajinagar (Bangalore) aser Vailankanni nung tongti sentong agitsü.

Sarasadem sentongji Catholic satellite television channels- Shalom TV, Goodness TV, Madha TV, Divyavani TV, Atmadarshan TV, Ishvani TV, CCR TV aser Prarthana Bhawan TV channels nung yoktsü aser Catholic YouTube channels nunga yoktsü.

Bombay nung tongti putir, Rev. John Rodrigues den choir temi Bandra, Mumbai nung aliba Basilica of Our Lady of the Mount nungi osangtajung kentem atentsü. Sarasadem sentong tenzüka St. Thomas, Santhome Cathedral Basilica, Chennai nung CCBI tatong Tir aser Madras-Mylapore nung tongti putir, Rev. George Antonysamy-i sarasademtsü.

St. Mary's Basilica, Shivajinagar, Bangalore nungi Secretary, CCBI Commission for Vocations, Rev. Dr Raymond Joseph-i Tsüingrem osang abentsü.

Ano Basilica of Our Lady of Graces, Sardhana, Uttar Pradesh nung CCBI Commission for Youth secretary, Chetan Machado leniba nung oshi tenet nung sarasademtsü. Jyotsna D'Souza, President, ICYM; Alex Diamond Raj, SG, Director, Montfort Bhavan, Meerut; Valentia Nongtdu, Finance Secretary, Jowai Diocese; John Paul, ICYM züingsem; Sudeepti,

FSLG, Staff Nurse, Our Lady of Graces Hospital, Sardhana, Prem Murmu, Assistant Director, Montfort Bhavan, Meerut aser Dr Lisa, FSLG, Our Lady of Graces Hospital, Sardhana nungeri Hindi, Tamil, Khasi, Telugu, Kannada, Santali aser Malayalam oshitem agi sarasademtsü.

Hyderabad nung tongti putir, Rev. Anthony Poola-i alima nung coronavirus wara anentsü atema sarasademtsü.

Iba dak alia coronavirus wara ajanga Arogoi asüpila sentong junga magitsüetba asür putirtem, nun tem aser Arogo züingsemtem bilemteta sarasademtsütsü.

Conference of Catholic Bishops of India-i Arogotem, Khristan kibongtem aser Khristan ajak dang August 7 aonung 8:30 ako nungi tenzüka ghonda ka sarasademba sentong nung shilem agitsü mepishia metetdaksüogo.

Tang Latin Catholic Church in India nung Arogo 132 aser züingsem million 18 dak tema lir.

ANO GO ABEN TSÜNGREM DEN

TEMESHI LAI AJANGA TASHITEMETET

"Aser koba Temeshi Lai agi Khrista Yisu dak amangba ajanga tekümtet atema na tashitemetet kümdaktsütsü akoker, aji nai lanuwa nungi meteta lir." 2 Timoti 3:15

Stephen Hawking, nungtogo Physicist (Scientist) aser Tsüingrem dak mamanger ka. Pai yamai zülu lir, "Tsüingrem mali. Shingaia alima meyunglu aser shiangaia asen taküm tia manishir" pa amaji, tanü asüing alima nung tashitemeteter aser nungtogo nisung aikati yimsü balala tenteta odagi. The Church of Scientology, ta asüba tentet ka nung nungtogo nusung aikati züingsem küma anidaker. Parnoki ashibaji, meimchir shiaji Tsüingrem ama liraser pa tekolokji Tsüingrem dak aliba ama lir. Pei sasa Tsüingremji kechi ama ta bilemer, bilemetsü atema lenmang sadema lapoka yutsür.

Alima nung tiyazüji shitak ma aser ochiji tai ama makmashishidaktsüba lima ka nung asenok tamangeretemi pei tangatetba ajakji Lai O nung tera yanga, sota alitsübaji kanga tongtipang, Pauli Timoti dang, naibo ne lanuwa nungi meteta dang lirji, lai O ajanga na tashitemetet kümdaktsür ta ashi.

Asenokiaaser chirnurtem lanuwa, kinü mapang nungi Lai o mesayurabang, alima nung tiyazü tesayubatem jenti atokdang, parnok mopung agi espshiba ama epshia alitsü. Asen atep nungi asenoki lepshia, pei chimur aser lanuwa asensortem dang, chichiba shisatsü angudakjibo Temshi Laishiba lir aser iba oji azüingba aser angatetba agidang lenmang mechemitsü ta sayutetsüji asen mapa tulutibaji lir.

SARASADEM:

Oba Tsüingrem, Onok ne Temeshi Lai agütsüba atema onoki tenüing asanger. Lai O meimtsü aser idak nungi shisatsü agitsü onok nem angatetdakjangma. Amen

Kerala nung Arogoi tanur 5 dak tema aliba kibongtem yaritsü

Kottayam (Kerala), Chiteni/ July 30 (Agencies): Tawa ketdangsüba Engineering college ka nung azüingertem India linük nung nütsüing kanga nem scholarships agütsütsü. Syro Malabar Arogoi Uttar Pradesh nungbo sorkari tenzüka scheme osang ya social media nung kanga Kerala nungbo Khristan kibong nung tanur pongu aser iba dak tema aliba kibongtem atema agizüküer. Family Apostolate Director, Joseph Kuttiankal-i, iba scheme ya nübener kibongtem yaritsü atema lir, talisa coronavirus wara sülen kibong tulutem nem teyari agütsütsü nükjidong nung iba scheme tenzüker, ta metetdaksü.

Tongti putir, Mar Joseph Perumthottam-i, "Kerala state tentetba mapang nung state nung tamangba yimsü sasep nung nütsüing timba aliba tanabuba jenjang nung Khristantem liasü, saka tangbo state nung Khristan nütsüingji shilem 18.38 dang lir. Tesüiba kum ishika tsüingda Khristantem tanur asoba shilem 14 ajema kumogo," ta metetdaksü.

Syro-Malabar Arogoi kübok Family Apostolate of the Pala-i tenzüka scheme kübok, 2000 kum sülen kibong kümer tanur pongu mesüra iba dak tema lir kibongtem nem ita shia sen 1,500 agütsütsü. Ano tanur pezübuba asotsü alir mashisa tetsürtem Arogoi ketdangsüba hospital ka nung angati tanur sotsütsü; iba dak alia tanur pezübuba mesüra iba dak tema aliba kibong nungi Arogoi

2019 kum nung Changanacherry Arogoi, Kerala state nung Khristan nütsüing kanga ajema kumogo, ta metetdakja liasü.

OLONG PAITEP # 5892

1			2			3		4		
					5					
		6								
							7			
		8								
9										10
				11		12				
13										
14										
						15				

TIPILEN		LANGTSÜNGLEN	
1. Chiyungtsü oksa	- (5)	1. An tetsü	- (5)
3. Tatalokbatem	- (5)	2. Juzüa senzüba shiruru	- (7)
5. Tama	- (6)	3. Tamendakdak	- (4)
6. Pei meyong aküm	- (3)	4. Tiak-asang	- (6)
7. _ _ _ _ bang	- (4)	7. Tasa	- (7)
8. Kinungpurtem	- (7)	8. Süngjang telung nung aliba	- (6)
9. Nokdak masü	- (4)	10. Ibai masü	- (5)
12. _ _ _ la	- (3)	11. Ano mamen	- (4)
13. Ochi masü	- (6)		
14. Yagi Sü ataker	- (5)		
15. Temadok	- (5)		

OLONG PAITEP # 5891 TELANGZÜBA

TIPILEN :		LANGTSÜNGLEN :	
1. Semtu, 3. Lepko, 5. Bilem, 8. Ulu,		1. Sayu, 2. Teb, 4. Kimong, 6. Lungkak,	
10. Tsünpang, 11. Tesangwa,		7. Milak, 9. Zünga, 10. Temopu,	
13. Aoksa, 15. Putir, 16. Yipru.		12. Walu, 14. Ali.	

KOMA SÜLA TELANGZÜBA

Q. Nagaland nung Covid vaccination ya nisungtem teimba ka dak magii anen nunga koma süla ?

Aki alemli nungi tashidak wara nokdangtsü mechi vaccine agia aru,ibaji nokdangba otsü mali. Covid-19 vaccine agitsü atema Govti küm nabuba ajungshia arudagi. Iba vaccine agibaya asen kisung atema masü, saka asen meketa alir, asen abuani, chirnur, semchir, kinunger, kiyonger, anogoshia külem inyakertem ajak wara nungi kümzüka alitsü asoshi NA aser NI agitsüla ta angateti.Vaccine magii Covid-19 tashidak menashia/prokshia odaktsürtemji tangatetba tajung malir, tashi mangar, nisung tepseter, linük anemer rongnung züngoktsü akok. Anungji Vaccine ya ajaki teküraba nung agitsüla nisung timba Vaccine magii anenra Naga lima ajunga taoksa tulu agi meneptsü südi ta kü tebilemba lemsar.

-WhatsApp

Tsümar temi moa kechiyung tsümartembu ajak na vaccine agir parnokbo shianga kidang mekazüi anogo shia mapa inyaker aser talisa Miya nungerbo ka tanga iba wara agi asüba mangashi. Anungji tasemben mesüra ya ser arudang Naga nungerbo tetsübu nung pei kidang süpteper kazüteptang ano tsümarsa langer anentsü.

-sms

Tashidak ya Pokteter joko tazüngtsübo küm 3 buba aor aser Iba tashidak agi alima ajunga nung nisung million aika sudaki. Anungji Iba tashidak ya ajungtsü asoshi mozü aser Vaccine yanglutetdakjang ta yimsu tapu balala amangertemi pie Tsüngrim dang sarasademogo. Sarasademba ama Tsüngremi langzua scinteist time mozü tachitsü aser vaccine yangluteta nisung ajaki agidaki aser Iba jagi nisung aika taneptsü ngudagi saka Ibai agitsü magitsü ano nisung aika ratamataba tia nung lir. India Sorkaribo sen millionsa million aika agi alia agidaktsür anungji shirnoki vaccine ya agitsüla ta sür agiogo parnok CORONA agi metongi lir. Saka shirnok terata nung ano vaccine magii lir parnok atemajibo magii anen nung tajungba asütsü ta tebelemba shidanger.

-T.AO Mokochung.

Nagaland nung teimbai vaccine maginür saka COVID ji menarbo sasaseta mashiyonga bushiküm, saka menuadoker tasütsüba dang.

-SMS

(Maneni tapak 9 nung...)

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimym

Kiok

(v) temulung nung jashia ayu (harbour of hurt feelings)

* Tsüraburi tanur teti arütsüra **kioka** ayur.

Kioktsü

(n) janaona aser anakawa bendenba / okdenba oset (broom)

* Kima aoktsü atemabo süra **kioktsü** tajungba.

NAI-A YA METETTER MA?

AUGUST ITA TONGTIBANG ANOGOTEM:

- 1 August (First Sunday of August) - Friendship Day
- National Mountain Climbing Day
- 6 August - Hiroshima Day
- 7 August - National Handloom Day
- 8 August - Quit India Movement Day
- 9 August - Nagasaki Day
- International Day of the World's Indigenous Peoples
- 12 August - International Youth Day
- World Elephant Day
- 13 August - International Lefthanders Day
- World Organ Donation Day
- 14 August - Youm-e-Azadi (Pakistan Independence Day)
- 15 August - Independence Day in India
- National Mourning Day (Bangladesh)
- 16 August - Bennington Battle Day
- 17 August - Indonesian Independence Day
- 19 August - World Photography Day
- World Humanitarian Day
- 29 August - National Sports Day
- 30 August - Small Industry Day
- 31 August - Hari Merdeka (Malaysia National Day)

TANÜBO NAI LANGZÜANG

Q. Koba küm World Drowning Prevention Day sangdong?

A.April 2021 B.April 2020 C.April 2018 D.April 2019

(Taruba adok nung onoki langzüsü)

YASHI ADOK TELANGZÜBA : Paris 1900

SUDOKU # 5932

TELANGZUBA # 5931

1			3	5			2	9	3	4	2	7	6	1	8	5	9
3		6	8				1		8	7	1	9	5	4	6	2	3
				9			4		5	6	9	8	2	3	4	1	7
9	6			4			3		6	8	5	4	7	2	3	9	1
5				9		7	1		4	9	7	1	3	8	2	6	5
	3		5	2	1	9	8		1	2	3	5	9	6	7	4	8
		4		8					7	1	8	6	4	9	5	3	2
	1			5					9	3	4	2	8	5	1	7	6
8		9		7				5	2	5	6	3	1	7	9	8	4

OJANG LUTEP # 5477

- REMNÜKTEME :
- GAI :
- ÜNGSER :
- AALIB :
- IMTYI :
- NNUG :
- SHITANIR :
- UNTAJG :
- DANKOGA :
- OKTSMADÜ :

OJANG LUTEP TELANGZÜBA # 5476

RONGSEN JENTI LIAKA TSÜNGREMI AGÜTSÜBA SENMANG DEN ITEMJI MEDEMDANGTSÜ MAKOK

TAN HOPTA ATEMA - KOMA SÜLA ?

Q. Mizoram aser Assam arrtsülen atalokba ama Nagaland aser Assam Police na ta arrtsü rapktepa khaten nunga koma süla?

Olong 20 shi nung August 09, 2021 tashi nung iba telangzuba ya onok dangi (e-mail - tiryimym@gmail.com) :

(SMS - 9856121232 / 9436072422) : (WhatsApp - 7005723372 / 8729995804) : (tiryimym.in) ajanga yokang. Telangzubatemi taruba Honibarnü adoktsüsü.



July 31, 2021 nü Patiala (Punjab) nung Sanjha Morcha züngsemtemi Punjab state sorkar dang parnok nem mapa agüjang, ta takhangba agüja longkak aitdang tetsür police temi parnok nokdangba noksa nung angur.

Sorkari tekaraba nung Parliament senden tembangtsüa akok

New Delhi, Chiteni/July 31 (Agencies): Pegasus mangatettep ken o ajanga tanü (July 31) agi anogo 9buba Parliament senden junga magiteti arudar, anungji sorkari tekaraba nung Parliament tembangtsüa akok, ta osang ka ajanga metetdaksü.

Tzüngluruwa mongpu Parliament senden July 19 nü tenzüka liasü aser August 13 nü tembangtsü, ajisiüka iba anogo matongdangsa tembangtsü atema sorkari bilemdar.

Honibarnü Union Minister kati, "Sorkari Parliament nung nübur dak sendakba onük ajak nung o lemteptsü melunga lir, ajisiüka Opposition-i yamaji mesüner. Iba ya mapang aser sen amajok nung indokba lir," ta ashi.

Minister-isa, "Coronavirus amokmeren aliba aser tesem aika nung iba tashidak kanga prokba osangtem nung ajemdaker sorkari senden tembangtsü atema telemtetba

agitsüa akok," ta ashi. Ajisiüka Parliament House anaprongla nung senden junga agitettsü atema sorkari maneni opposition lenirtem den jembitsü merangtsü, ta minister-isa metetdaksü.

Opposition party temi Parliament nung Pegasus spyware ken o süoka o lemteptsü akhanger, ajisiüka sorkari iba ken o dak alaka tanga onüktembo ajak jembitsü, ta shiogo.

Parliament tenzüksü anogo ka dang lia July 18 nü Pegasus spyware osang ya jungkai adoka liasü. Iba ken o nung ajemdaker Lok Sabha nung opposition-i timtem agütsür. Sorkari bill pongubo benokogo; Hokolbarnü General Insurance Business (Nationalisation) Amendment Bill 2021 aser Commission for Air Quality Management in National Capital Region and Adjoining Areas Bill, 2021 benoka agizükogo aser taruba hopta tanünga bill asemji benoktsü.

Congress lenir kati, "Tang Opposition longjema lir aser onoki iba (Pegasus) ken o benoka o lemteptsü atema akhanger, aser onoki iba nungjagi masetshitsü," ta metetdaksü.

Hokolbarnüa Congress lenir, Adhir Ranjan Chowdhury-i, "Opposition-i Pegasus onük nung o lemteptsü. Onoki aluyimba bills aser Covid tensa densema onük ajak nung o lemteptsü, ajisiüka sorkari memelunger," ta metetdaksü.

Pegasus ken o dak sendakba nung Parliamentary Affairs Minister Prahlad Joshi-i, iba onük ya tongtibang onük ka masü; sorkari nüburtem dak sendakba onüktem nung ang o lemteptsü, ta metetdaksü.

Hokolbarnü Lok Sabha nung Congress, DMK, Left parties, BSP, SAD aser Trinamool Congress MP tem sabangleni oa yimyim ayima aluyimba ozüngtem aser Pegasus onük nung o lemteptsü takhangba agüja liasü.

India nung ano nisung 41,649 dak Covid putet aser 593 asü

New Delhi, Chiteni/July 31 (Agencies): India nung ano nisung 41,649 dak coronavirus putetogo aser tang iba tashidak agi teshirangdakpur (timba) 4,08,920 kümogo, ta Honibarnep Union Health Ministry-i metetdaksü.

Tesüiba ghonda 24 tsünga linük nung coronavirus agi shiranger 593 süogo, aser tang tashi nungbo iba tashidak agi asür

ajak senteper 423,810 jungogo. Tang linük nung hopta shia coronavirus positive putetba shilem 2.42 aser anogo shia positive putetba shilem 2.34 jungogo, ta Health Ministry-i metetdaksü.

Tesüiba ghonda 24 tsünga coronavirus agi shiranger 37,291 anepogo aser tang tashi nung coronavirus agi shiranger shilem 97.37 anepogo.

Tang tashi nung coronavirus vaccine dose crore 46.15 agütsüogo aser iba nungjagi nisung 101,698,166-i dose anaprong agi aser nisung 35,98,20,313-i dose ka agiogo.

Health ministry-i ashiba agi, Hokolbarnü vaccine dose 52,99,036 agüja liasü. Linük nung vaccine dose anaprong agir timba state ji Maharashtra (nisung 1,09,71,677) lir.



July 31, 2021 nü Ahmedabad nung aliba süoshi ayokba market ka nung dokan kiburtem coronavirus agitsü atema tarensena nokdaka aliba noksa nung angur.

Lalan Singh JD(U) National Tir shim

New Delhi, July 31 (Agencies): Honibarnü New Delhi nung JD(U) party national executive senden nung Lalan Singh JD(U) party Tir shimogo; iba senden nung Bihar Chief Minister, Nitish Kumar aser JD(U) lenir, KC Tyagi nata aden.

Lalan Singh, ta ajasang Rajiv Ranjan Singh ya Munger menden nungi Janata Dal (United) MP lir aser Honibarnü pa party Tir shim.

Lalan Singh-i RCP Singh melenzüker. Narendra Modi-i aniba sorkar nung RCP Singh

cabinet minister shimba sülen pa JD(U) Tir menden nungi anena liasü.

Bihar kübok Munger Lok Sabha constituency nungi MP, Lalan ya tesüiba küm aika Bihar Chief Minister Nitish Kumar den kanga atongsema inyaka aruogo aser party junga yangerba nung pai tongti shilem aika agiogo.

2020 Assembly election matongdang Chief Minister, Kumar JD(U) Tir inyaka liasü, saka pa chief minister inyaktü atema tenüngzükba agiba sülen RCP Singh-i pa melenzük.



July 31, 2021 nü Kolkata nung TMC lenir Kunal Ghosh, Sonagachi kiyong tonga aruba noksa nung angur. Centre sorkari benoka aliba Anti-trafficking bill dak sendakba nung pei mang ayokertem den o lemteptsü atema pai iba kiyong semdang.

Covid kanga prokba district tem nung tenokdangba alitsüla: Centre

New Delhi, July 31 (Agencies): Tesüiba hopta ishika tsünga coronavirus positive shilem 10 dak tema putetba district tem nung tenokdangba tesashiba benoktsüla, mesüra nisung senzüsempongba aser lokti adenshiba nokdangtsüla, ta Honibarnü Centre sorkari state ter nem metetdaksüogo.

Linük nung district 46 nung coronavirus positive shilem 10 dang nungi tema lir aser district 53 nung coronavirus positive putetba shilem 5 nungi 10 tsünga lir, ta metetdaksü. Centre-i item states dang coronavirus putettsü atema akokba tashi nisung timba dak tendangtsü tuyu.

Union Health Ministry-i, tang ama tensa ka nung melung lemer aliba ajanga item district nung wara tensa ano tamajungba akümtsü, ta metetdaksü.

Honibarnü Union Health Secretary, Rajesh Bhushan leniba nung senden ka mena state 10- Kerala, Maharashtra, Karnataka, Tamil Nadu, Odisha, Assam, Mizoram, Meghalaya, Andhra Pradesh aser Manipur state tem nung coronavirus tensa asadanga liasü.

Item states nung health ketedangsertemi wara azüoktsü atema inyakba mapatem-a

senden nung asadanga liasü. Item states nung anogo shia coronavirus case timba akümer mesüra positive putetba shilem timba kümdar.

Senden tembangba sülen Health Ministry-i sangdong ka ajanga, "Tesüiba hopta ishika tsünga coronavirus positive shilem 10 dak tema putetba district tem nung wara prokba nokdangtsü atema tenokdangba tesashiba benoktsüla, mesüra nisung senzüsempongba aser lokti adenshiba nokdangtsüla," ta metetdaksü.

Item states nung coronavirus agi teshirangdakpur shilem 80 bo home isolation nung lir, aser iba wara prokba nokdangtsü atema tang teshirangdakpurtem dak tenük yoktsüla aser mejungi shirangertembo medical treatment agitsü atema mapang shidak nung hospital-i anir aotsüla, ta Health Ministry-isa metetdaksü.

Ano külen Indian Council of Medical Research (ICMR) Director General, Dr Balram Bhargava-ia state tem dang peipei state nung teintet sensotem aser arrshi küm 45-60 purtem dak rangloker vaccine dose tekaraba nung agütsütsüla, kechiyong iba tashidak agi asürtem shilem 80 jungnüabo item rogotem lir, ta metetdaksü.

Happy Birthday

TENÜNG : CHYONGSHIR IMSONG

Tasoba anogo : August 1, 2019

Küm : 2

Talidak : Kuda village Dimapur

Jabaso küm ana tashi anema arishi moatsü nung Teyanglur tenüng asanger, maneni ano anema aliba den arishi moajang ta sarasademtsür.

- Temeim Oja, Oba & Odi





United States Defense Secretary Lloyd Austin-i, Quezon City, Metro Manila, Philippines kubok Camp Aguinaldo military camp nung military honor guard asadanga noksa nung angur. Defence dak sendakba nung linük ana tsungda tesendaktep yanglushitsü atema Philippine nunger ketdangsürtem den sensak asemstsü atema Austin-i Manila semdangba mapang ka lir.

Tanker ka amakba atema Israel-i Iran dak tai tongloktsü

Dubai, Chiteni/July 31 (Agencies): Oman tzüküm nung Brehostibarnü Israel-i achaayangba petroleum product tanker ka amakba mapang Britishi nunger ka aser Romania nunger ka süogo, ta company-i Hokolbarnü metetdaksü. Israel foreign minister-i iba tatalokba ya Iran dak tai tongloktsüogo aser telangzüba tesashi ka agütsütsü langa lir, ta ashi.

Israel meyong Zodiac Maritime company indang Liberian wako songer Japan nunger rong Mercer Street amakba dak sendakba nung tibeledangba balala adokogo aser tzüym nung rakzükrademertemi amaka asütsü ta sangdongogo. Kasa mapang nung Oman Maritime Security Center-i iba tatalokba ya Oman litzü adener atalok ta shiogo.

Ita tsungda Iran aser Israel na kati ka indang rong amakba atema aitsütepa arudar aser Israel Foreign Minister Yair Lapid-i ashiba agi, pai Britain foreign secretary dang British nunger ka aser Romania nunger ka ta tepsetba tatalokba dak sendakba nung telangzüba tesashi ka agütsütsü ta shiogo.

"Iran ya Israel atema dang tebilemtsü masü, saka parnok-i kiralongrara aser teraksatsüba belener aser linüktem süngjema milidaksür aser iba ajanga ajak dak kongshir. Iran nungeri

kiralongraba maparen balala benoka inyakba mapang alima ola madoki malitsüla, iba ajanga tzüym nung inyaksangshi dak kongshir," ta Lapid-i ashi.

Itangitertemi osang agütsüba jangjaa aliba US aser European source balala ajanga ashiba agi, iba tatalokba nung temulung meleme bilemertem rongnung Iran tongtiba lir, aser US defence ketdangsürtemi ashiba agi drone amshia rong amak asütsü akok, ajisüaka sorkari kuli tejangja metetrang jenjang aginer.

Iran sorkar meyong Arabic oshi television network Al Alam TV-i, Syria nung Dabaa airport Israel-i amak asütsü ta temulung meleme bilemba atema telangzüba ka agüja rong amak, ta source balalai ashiba sangdonga liasü.

Rong amakba atema Iran dak tai tongloktsüba dak sendakba nung Iran nunger ketdangsürtemi kecha telangzüba magütsü.

Israel indang news website Ynet sangdong ka ajanga ashiba agi, Israel nung iba ken o asadanga sülen iba rong ya ghonda ishika pilar anaben amak ta asatetogo. Mezüngbuba amakba mapang teraksatsüba kecha matalok aser tanaben amakba mapang bridge dak kongshi aser nisung ana asü.

Israel nunger ketdangsür kati ashiba agi, "iba tatalokba memetet ama toktsütsü asoshi

Israel atema tasak asütsü."

2018 küm taoba US tir Donald Trump-i linük balala den Tehran indang 2015 nuclear deal yanglur aliba nungi Washington atsüngina Iran nem tenokdangba agütsüshiba sülen Gulf tesem nung tensa mejungi aküm.

Iran-i nuclear arms yanglutsü merangba ya US tembar Israel atema lendong ta United States-i bilemer, koba Tehran-i magizüker.

Maritime security information agütsüba telok United Kingdom Maritime Trade Operations (UKMTO)-i, rong amakba ya tzüym nung rakzükrademertem mapa masü, ta shiogo. Iba rong amakba mapang rong ya Omani nung rongnendak Duqm nungi anüdoктиen nautical miles (280 km) 152 shi dang pilar liasü, ta UKMTO-isa ashi.

London nung amendaker aliba Zodiac Maritime, koba Israel nunger shishilembar Eyal Ofer-i aziüoker, pai ashiba agi, iba rong ya US Navy-i miner rong crew-i achaayanga rong tashi agi tekümzükbä tesem ka bushiaogo.

Refinitiv ship tracking sangdong ka ajanga ashiba agi, iba tanker ya Tanzania kubok Dar es Salaam nungi United Arab Emirates indang bunkering port aser oil terminal Fujairah-i oya liasü.

Malaysia-i Sarawak State nung Emergency Rule atsülangtsü

Kuala Lumpur, Chiteni/July 31 (Agencies): Malaysia sorkari linük anüdoklen aliba Sarawak state nung state of emergency 2022 küm February ita tashi atsülangtsüogo. State of emergency benoker aliba atsülangshitsüba ya COVID-19 wara pokteter aliba mapang regional elections magi-i atatsü atema benokba lir, ta state news agency Bernama-i Honibarnü sangdong ka ajanga metetdaksü.

COVID-19 tashidak prokshi aoba nokdangtsü atema Malaysia ajunga nung tang emergency temzüng ozüng benoka lir, saka iba ya Deobarnü tembangtsü.

Ajisüaka Sarawak nung emergency benoker aliba ya 2022 küm February ita 2 nü tashi atsülangtsüogo, ta Bernama sangdong ajangsa

metetdaksü. Linük chuba Al-Sultan Abdullah-i, COVID-19 tashidak tali menatepa aoba nokdangtsü atema state election sota atatsü asoshi emergency benoktsü tetuyuba agütsü, ta Bernama-isa metetdaksü.

Sarawak legislative assembly indang term June 6 nü tembangogo. National emergency benoker aliba ajanga election magitetsüsa aküm aser iba ajanga term atsülangshitsü.

Malaysia nung hopta ishika COVID-19 tashidak kanga kara prokshia odar. Iba hopta anogoshia tashidak potetba nung otsü tasen ka yanglua nisung 17,405 tashi dak tashidak potetogo. Malaysia nung Hokolbarnü tashi nung ajak senteper nisung 1,095,486 dak tashidak potetogo.

Rashad Hussain religious rights ambassador kümogo



Rashad Hussain

Washington, Chiteni/July 31 (Agencies): US tir Joe Biden-i, International Religious Freedom Ambassador asütsü Indian American, Rashad Hussain shimogo, shiba US diplomacy nung tamangba yimsü ajungkettsü atema tekolak ser inyaksü asoshi shimba Muslim nunger mezüngbuba asütsü.

Rashad Hussain ya National Security Council nung Partnerships & Global Engagement Director lir. Taoba mapang pai Department of Justice's National Security Division nung Senior Counsel mapa benogo, ta White House sangdong ka ajanga metetdaksü.

Obama yimsüsüba kubok Rashad ya Strategic Counterterrorism Communications atema Organization of Islamic Cooperation (OIC) dangi US Special Envoy aser Deputy Associate White House Counsel liasü.

Ambassador ka ama Hussain-i, Organisation of Islamic Cooperation (OIC) aser United Nations, bendanger sorkar aser lokti tentet balala den education,

entrepreneurship, health, international security, science, technology aser lenla balala nung longjemer inyaksü atema inyaktepa aruogo.

Maneni Rashad lenisüba nung anti-Semitism anema aser Muslim nungeri amokbanger aliba linüktem nung tamangba yimsü tsütsü nütsüngyongsük agi ajema aliba loktitem kümzüka ayutsü atema inyaka aruogo.

Obama administration nung maden tsungda pa US Court of Appeals nung Sixth Circuit atema Damon Keith indang judicial law clerk liasü aser Obama-Biden Transition Project nunga pa associate counsel rongnung ka liasü, ta kasa sangdong ajanga metetdaksü.

Hussain ya Yale Law School nungi law degree agizük aser Harvard University nungi Arabic aser Islamic Studies nung master's degree agizük.

Kasa mapang nung American Jewish Committee (AJC)-i, United States Ambassador-at-Large for International Religious Freedom atema Hussain shimba asoshi Biden Administration dang kanga pelaba lemsatetogo.



Washington nung White House anasa Lafayette Square nung tenokdangba agütsür aliba tesem ka pongdanga aiba atema nisung ka apuba noksa nung angur.

Dept. of Agriculture, Kohima-i ketdangsür ana den tepila sentong agi



Kohima, Chiteni/July 31, 2021 (TYO): Honibarnü, Department of Agriculture Kohima ajanga Joint Director of Agriculture ketdangsür ana - Bendanglila aser L.Hangshing den tepila sentong agia liasü, ta sangdong ajanga metetdaksü. Iba sentong nung, Additional secretary Agriculture, Nungsangwapang Jamir-i Department of Agriculture, Kohima, Joint Director mapa nungi anisüngzüker ketdangsür ana nem tenüngsang agütsü. Sorkar tenzüksü asoshi

bendanga agüja aser pei dak aketba sempet tajungtiba amshia inyakba atema pai ketdangsür anaprongla dang pelaba lemsatep. Iba den külemi Department maparen tsütsü shisatsü agi nungita yaria aser külem staff pur den amalitepa inyaka aruba atema, paisa ketdangsür ana dang pelaba shisem. Department tenüng nungi Addl. Director of Agriculture, S.Kivikhu Achumi-i jembia liasü. Achumi-i, iba mapa nungi

anener sülen tarutsü nunga ketdangsür anaprongla taküm temoatsü nung liyonga aotsü imlar ta lemsatep aser mapa nungi anenba sülena, nüngdakba mapang Department nung shisatsü agüja maneni nungita yaritsü asoshi pai ketdangsür anapronglai dang mepishiogo. Kasa sentong nung, Bendanglila aser L.Hangshing nati jembi. Iba sentong nung Director of Agriculture M Ben Yanthan menden liasü, ta kasa sangdong nung shia lir.

TESÜNEP NUNG ANISÜNGZÜKANG

Asür N. Allem Aier




(23rd Jan. 1949 - 25th July 2021)

"Shingaia maneptsütettsüsa, tasübai temulung nung tejashi ka yutsür, temeimbo shingaia maoyatettsüsa temulung nung alir"

TEYARI ATEMA NENOK AJAK DANG KANGA PELAR

-Temeim kinungtsü, jalatem, semchirtem, anük-apang & kinungertem.

August 19 nü 'Bell Bottom' sayatsü



Mumbai, Chiteni/July 31, 2021 (Agencies): Bollywood star Akshay Kumar aser Vaani Kapoor nati tongti shilem agiba film - Bell Bottom sayatsü asoshi anogo ka lemtetogo. Kanga dang yongya ataba, spy thriller ya August 19, 2021 nü theatre nung sayatsü terenemba lir. India nung Covid-19 tensa mejungi akümba ajanga, iba film sayatsü asoshi ishíbenka anogo atsülangja liasü. Iba film July nung sayatsü sentong renem, saka August nungang sayatsü ta film yanglurtemi osang

metetdaksü. Twitter sabang nung, Akshay Kumar-i fans den Bell Bottom motion picture indang noksa tasen ka lemsatepba den iba film sayatsü anogo sangdongogo. "Theatre nung iba film ajanga nenok peladaksütsü tebilemba lir. August 19, 2021 nü #BellBottom sayatsü," ta Akshay-i lemsatep. Ranjit M Tewari-i iba film direct süogo aser Akshay indang project tasenba ya tatalokba otsü ajanga ajungmesoa yangluba film ka

asütsü. Iba film nung Akshay-i akhi mapang sübosülemtsü tem semer shilem agiba angutsü aser film ya 1980s mapang nung atalokba ama yangluogo. Pooja Entertainment den Emmay Entertainment longjemer 'Bellbottom' sayatsü. Iba film ya Vashu Bhagnani, Jacky Bhagnani, Deepshikha Deshmukh, Monisha Advani, Madhu Bhojwani aser Nikkhil Advani nungeri yangluogo. Iba spy thriller nung Akshay dak alia, Huma Qureshi aser Lara Dutta nati tongti shilem agiogo. Lara-i taoba mapang Ato Kilonser Indira Gandhi shilem agiba angutsü. Kasa mapang, Vaani-i Akshay kinungtsü ama shilem agiogo. Alima ajunga asüngba coronavirus wara mapang, tongtibang Bollywood project tenzüka aser maparen takok ngua tembangba rongnung 'Bell Bottom' mezüng asütsü. Iba film nung Vaani aser Akshay na külemi shilem agiba mezüng angutsü.



Tuensang, Chiteni/July 31, 2021: Mongolbarnü (27.07.2021) EAC Tuensang, Ketsintle Tep matsüngdang, Tuensang District administration aser police den court staff, CTS (Chang Women Organization) aser DB nungeri jana bendenba tesem (dumping site) nung IMFL raksatsüba mapang tangokba noksa ka yangi angur. Item IMFL nung rum' bottle 204 aser 'can beer' 24 dena lir, ta sangdong ka ajanga metetdaksü.

Kohima DC ajanga metetdaksür

Kohima, Chiteni/July 31, 2021 (TYO): Deputy Commissioner Kohima, Gregory Thejawelie NCS-i, sangdong ka ajanga, Kohima Local Ground (Khouchiezie), kong COVID-19 testing atema swab tem bendenba maparen teinyakdak lir, iba tesem nung tanga sentong/maparen ajak nokdang, ta metetdaksü. Anungji, Kohima Local Ground (Khouchiezie) nung COVID-19 testing maparen dak alaka, nisung kari danga tetuyuba anema maparen kar danga inyakra, Disaster Management Act 2005 aser Indian Penal Code indang Section 188 temzüng agi melaba ama temerenshi tapet agütsütsü, ta DC-isa metetdaksü.



Nagaland RD Minister, Metsübo Jamir ajanga achayanga 'ACT Grants Team, India nungi teyari anguba Oxygen Concentrators 31 Mokokchung CMO office tonger külen tangokba noksa nung angur. Ibai Mokokchung district kübok PHCs aser CHCs shia nem lema agütsütsü, ta osang ajanga angazüker. Mokokchung nübur tenüng nung Minister & Mokokchung district In-charge, Metsübo-i ACT Grants Team dang tenla tulu agütsüba asoshi pelaba lemsatep. Mokokchung, July 31, 2021

KOMA SÜLA TELANGZÜBA

Q. Nagaland nung Covid vaccination ya nisungtem teimba ka dak magii anen nunga

(Tapak 6 nungi...) Nibo iba vaacination yabo teimba ka dak magii odang anen nunga kecha balakabo masütsü ta dang bilemer no.

-SMS

Covid tashidak pokteter joko tazüngtsübo küm 3 buba arur aser iba tashidak agi alima ajunga nung nisung tazüngtsübo million aika südaki. Anungji iba tashidak ya ajungtsü asoshi mozü aser vaccine yanglutetdakjangma ta yimsü tapu balala amangertemi pei Tsüngrem dang sarasademogo. Sarasadaemba ama Tsüngremi langzüa scientist temi mozü tachitsü aser vaccine yangluteta nisung ajaki agidaki aser iba jagi nisung aika taneptsü ngudaki saka iba agitsü magitsü ano nisung aika ratamata tia nung lir. India sorkaribo sen million-sa million aika agi alia agidaksür anungji shirnoki vaccine ya agitsüla ta ser agiogo parnok Corona agi metongi lir. Saka shirnok terata nung ano vaccine magii lir parnok atemajibo magii anen nung tajungba asütsü ta tebilemba shidanger.

-T. Ao

Tokyo Olympics: Kamalpreet Kaur final-i iogo PV Sindhu semi final nung tsükogo



Tokyo, Chiteni/July 31, 2021: 2020 Summer Olympics nung tetsür 'discus throw' indang qualification round asayaba mapang India tsür Kamalpreet Kaur-i shilem agiba yangi noksa nung angur.

Tokyo, Chiteni/July 31, 2021 (Agencies): Honibarnü, Tokyo Olympics - tetsür Discus Throw Qualification round nung, Kamalpreet Kaur-i takok ngua final tongtetogo. Patiala nungi arishi küm 25 tain Kamalpreet Kaur-i taküm Olympics nung mezüing shilem agir asütsü.

Tetsür Discus Throw Qualification round nung Kaur-i metre 64 tashi yoktetba sülen, final atema la temsüa aküm. India athlete rongnung otsüsütsüsa lai jenjang ka ajangzüktogeto.

Iba qualifying round tetoktepba nung, Kaur-i taoba Olympic nung gold-medal takok angula Croatia tsür Sandra Perkovic (63.75m) aser world champion Cuba tsür Yaime Perez (63.18) na tsükdaksü. Final round atema automatic qualifier asür asayar ana rongnung Kaur densem. Tanabuba asayar ji America tsür Valarie Allman (66.42m) asütsü. August 2 nü final asayatsü.

Kaur ya Punjab kübok Kabarwala yimtsüing nung aluyimer kibong nungi lir. Taoba küm tatemlen, Covid tensa ajanga tetoktepba asayamung tem masayatetba yong, Kaur kanga jashiseta liasü. Ano külen la 'depression' agi kangshia liasü aser lar yimdak lai cricket asayatsü tenzük.

"Kabarwala yimtsüing anasa Badal tesem nung SAI Centre ka lapoka lir aser 2014 küm nungi taoba küm tatemlen tashi iba Centre nung training agia aru. Covid-19 wara ajanga iba Centre nung maparen ajak shibangtsü aser iba mapang la depression agi kangshia liasü. Lai asayamung talisa Olympics nung shilem agitsü tejangraba lemsatop," ta Kaur indang coach Rakhi Tyagi-i ashi.

"La kanga dang animesüingzüktogeti shisabulua liasü aser atangi nunga lai cricket asayatsü tenzük. Lai cricket asayamung mesüra cricket

asayar takotet ka akümstü tebilemba nung masü, saka kecha teinyaktsü maliba yong lai cricket asaya. Kidang kazütsü melen, lai moapu nung cricket asaya liasü," ta Rakhi-i ashi.

Sports Authority of India coach, Rakhi Tyagi-i Kaur den külemi Tokyo-i motet. Tesüiba ita ishika tejakdang, Olympics achaayangertem nem agütsüba tenüing list nung Rakhi maden asünung, lai Kaur den külemi motet. Ajisüaka, iba Olympics nung Kaur-i junga asayar lai medal takok angutsü ta Rakhi-i lemsatopa liasü.

Kaur-i mezüing throw' nung metre 60.29 shi yok, saka tanabuba nung lai metre 63.97 tashi yokteta liasü. Kasa tetoktepba nung, Kaur indang idol aser Olympic nung pezüben tashi shilem agila Seema Punia-i final asaya atema qualify mesütet aser lai metre 60.57 dang tongteta jenjang 12buba nung tembang.

Tokyo, Chiteni/July 31, 2021 (Agencies): Tokyo Olympics - badminton asayamung tetsür kija semi final asaya nung, World champion PV Sindhu-i makokba ajanga, Olympic badminton asayamung nung India atema mezüing gold medal takok angutsü teimla samaogo. Honibarnü tetsür kija semi final asaya nung, Chinese Taipei tsür aser world no.1 Tai Tzu-Ying-i Sindhu tsükdaksü.

Ajisüaka, Rio Games nung silver medal takok angula, Sindhu-i bronze medal angutsü asoshi asaya ka nung shilem agitsü anünga lir. Deobarnü, Musashino Forest Plaza nung tasembuba jenjang atema Sindhu-i China tsür He Bing Jiao den tokteptsü.

Tesüiba küm pungo nungi tongtibang asayamung balala nung medal takok ngua shilem agila, Sindhu-i 18-21 12-21 agi Tai Tzu makok.

Tang asaya aliba Olympics densema, Sindhu aser Tai na tsüingda 19ben tashi asayar asütsü, kong Sindhu-i Tai den asaya 14buba nung tamakok



PV Sindhu

ngugo. Tesüsa asayaba match asem tashi nung Sindhu-i Tai Tzu makok.

Hokolbarnü, tetsür kija quarter final asaya nung, seed 6buba Sindhu-i world no.5 Japan tsür Akane Yamaguchi madak takok ngur sülen, Honibarnü semifinal nung shilem agia liasü.

Kasa asayamung tebur kija asaya nung India nunger B Sai Praneeth aser tebur tarep nung külem India nunger Chirag Shetty aser Satwiksairaj Rankireddy nungeri tamakok anguba yong, parnoki knockout stage atema qualify mesütet.

India tetsür hockey team quarter-final-i iogo



Tokyo, Chiteni July 31, 2021: 2020 Summer Olympics nung tetsür hockey Pool A nungi India aser South Africa team asayaba mapang India tetsür team-i goal ka idaktsür sülen pelatepba yangi noksa nung angur.

Tokyo, Chiteni/July 31, 2021 (Agencies): Honibarnü, Tokyo Olympics - tetsür hockey asayamung pool A nung India aser South Africa na asaya liasü. Iba asaya nung India tetsür team-i goal 4-3 agi South Africa tetsür team tsükdaksü.

Kasa anogo, asaya tanga ka nung, Great Britain-i Ireland 2-0 agi akokba sülen, India tetsür hockey team quarterfinal nung asayatsü temsüa kümogo.

Iba group nung, India tetsür team mezüing asaya asem tashi nung tamakok ngur sülen, quarter final tongtettsü asoshi parnoki maongka aika mengutet. Ajisüaka, tesüiba anogo ishika tejakdang India team-i Ireland madak 1-0 agi takok anguba ajanga, parnoki iba group nung maneni shilem agitsü asoshi lenmang sadema lapok.

Küm 41 sülen, Olympics asayamung nung India tetsür hockey team-i otsüsütsüsa taküm Tokyo Games nung mezüing quater final tongteter asütsü.

Tang, India contingent nungi tetsür aser tebur hockey team anaprongla quarter final

tongtetogo. India team atema Vandana Katariya-i hat-trick (goal) idaktsü.

South Africa-i asemben tashi goal idakja India den meneptepa asaya, saka goal pezübuba meydaktsütsü asoshi India-i nokdanga asaya. Quarter pezübuba nung India-i penalty corner ka yoktsü maongka angu aser iba penalty corner ajanga Vandana-i la indang goal tasembuba idakja liasü.

India team atema Vandana-i minute 4buba, 17buba aser 49buba nung goal asem idaktsü, kasa asaya nung Nehal Goyal-i minute 32buba nung goal ka idakja liasü. India-i tasa tajung amshia asaya saka parnoki South Africa amokbanger asayatsü maongka kangarabo mengutet. South Africa, shirnok Tokyo Olympics hockey asayamung tenzükür külen nungi group telemsa asaya ka nungdanga takok mangu, iba group asaya tatembuba nung parnoki goal asem tashi idaktsü. Protea team atema, Tarryn Glasby (15th), skipper Erin Hunter (30th) aser Marizen Marais (39th) nungeri goal ka idaktsü.

Isuru Udana cricket asaya nungi anener

Colombo, Chiteni/July 31, 2021 (Agencies): Honibarnü, Sri Lanka tebur cricket team nungi fast bowler Isuru Udana-i international cricket wadang nungi anenba sangdongogo.

Sri Lanka National cricket team nungi Udana-i küm 12 tashi asaya arudang ODIs 21 aser T20Is 35 nung pai shilem agiogo aser asayar tasen nem maongka agütsütsü tebilemba nung iba wadang toktsür, ta pai

lemsatop. "Kü dak aketba sempet tajungtiba amshia aser bendanga agütsür linük atema nümatanga asayaogo. Tarutsü asoshi asayar tasentem nem maongka agütsütsü atema ni iba asaya wadang nungi anener," ta pai ashi.

Fast bowler Udana-i ODI nung wicket 18 aser T20I nung wicket 27 agiogo. Tesüiba anogo ishika tejakdang Colombo nung India aser Sri

Lanka na tsüingda tanabuba T20I asaya nung pai tesüsa shilem agia liasü. Iba asaya mapang, pai over ka dang aon aser par team-i wicket 4 agi iba asaya koktet.

Udana cricket asaya nungi anenba osang angashia, taoba mapang Sri Lanka captain Angelo Matthews-i, cricket wadang nungi anener sülen, tarutsü nung nai inyakba ajak nung takok angutsü imlaa atar, ta lemsatop.

TOKYO 2020 NUNG INDIA TEAM ASAYATEM DEOBARNÜ (AUGUST 01, 2021)

#Cheer4India

TIME	EVENTS	ATHLETES
04:11 AM IST	Golf: Men's Round 4	Udayan Mane
05:18 AM IST	Equestrian: Cross Country - Individual	Fouaad Mirza
05:55 AM IST	Golf: Men's Round 4	Anirban Lahiri
09:36 AM IST	Boxing: Men's +91 Kg Quarterfinal	Satish Kumar
05:00 PM IST	Badminton: Women's Singles Bronze Medal Match	PV Sindhu
05:30 PM IST	Hockey: Men's - Quarterfinal India Vs Great Britain	Team India

BILEMDANGANG

"Tangar dang aiben ashiba dang nungi nai ka inyakbaji taoba."